

I. DISPOSICIÓN XERAIS

MINISTERIO DE TRABAJO E INMIGRACIÓN

21052 *Real decreto 2007/2009, do 23 de decembro, sobre revalorización das pensións do sistema da Seguridade Social e doutras prestacións sociais públicas para o exercicio 2010.*

A Lei 26/2009, do 23 de decembro, de orzamentos xerais do Estado para o ano 2010, contén, dentro do seu título IV, os criterios de revalorización das pensións do sistema da Seguridade Social para ese exercicio, e prevé a súa revalorización de acordo co índice de inflación previsto.

De acordo coas previsións legais, este real decreto establece unha revalorización xeral das pensións da Seguridade Social, incluído o límite máximo de percepción de pensións públicas, do 1 por cento.

A revalorización das pensións da Seguridade Social nos termos sinalados supón o incremento do seu poder adquisitivo, superando as previsións que sobre o seu mantemento se establecen no artigo 48 do texto refundido da Lei xeral da seguridade social, aprobado polo Real decreto legislativo 1/1994, do 20 de xuño, na redacción dada pola Lei 24/1997, do 15 de xullo, de consolidación e racionalización do sistema da Seguridade Social.

Por outra parte, de conformidade coas previsións legais e atendendo o compromiso do Goberno de mellorar a contía das pensións mínimas por encima da revalorización xeral, prevense incrementos que, no que ás prestacións de carácter contributivo se refire, oscilan entre o 4,87 e o 2 por cento, segundo os casos.

Así mesmo, actualízanse as contías das asignacións en favor de fillos con discapacidade con 18 ou máis anos.

Finalmente, en cumprimento do previsto no artigo 42.Dous da Lei 26/2009, do 23 de decembro, contén as normas de desenvolvemento necesarias en canto ao procedemento de solicitude, recoñecemento e aboamento do complemento establecido nese precepto legal en favor dos perceptores de pensións de xubilación e invalidez, na súa modalidade non contributiva, que residan habitualmente nunha vivenda alugada ao pensionista por propietarios que non teñan con el relación de parentesco ata terceiro grao.

Na súa virtude, por proposta do ministro de Traballo e Inmigración, coa aprobación previa da vicepresidenta primeira do Goberno e ministra da Presidencia, de acordo co Consello de Estado, e logo de deliberación do Consello de Ministros na súa reunión do día 23 de decembro de 2009,

DISPOÑO:

TÍTULO I

Pensións do sistema da Seguridade Social na súa modalidade contributiva

CAPÍTULO I

Normas comúns

Artigo 1. *Obxecto.*

Mediante este real decreto procédese ao desenvolvemento das previsións contidas, en materia de revalorización das pensións do sistema da Seguridade Social e doutras prestacións sociais públicas, na Lei 26/2009, do 23 de decembro, de orzamentos xerais do Estado para o ano 2010.

Artigo 2. *Ámbito de aplicación.*

1. O establecido neste título será de aplicación ás pensións de incapacidade permanente, xubilación, viuvez, orfandade e en favor de familiares do sistema da Seguridade Social na súa modalidade contributiva, sempre que se causasen con anterioridade ao 1 de xaneiro do ano 2010.

2. As pensións do extinguido seguro obrigatorio de vellez e invalidez rexeranse polas normas específicas contidas nos artigos 8 e 13.

3. Quedan excluídos do disposto no número 1 os réximes especiais das Forzas Armadas, de funcionarios civís da Administración do Estado e dos funcionarios ao servizo da Administración de xustiza.

CAPÍTULO II

Revalorización de pensións non concorrentes

Sección 1.^a Pensións do sistema

Subsección 1.^a Normas xerais

Artigo 3. *Importe da revalorización.*

1. As pensións comprendidas no número 1 do artigo anterior, causadas con anterioridade ao 1 de xaneiro de 2010 e non concorrentes con outras, revalorizaranse o 1 por cento.

2. O importe da pensión, unha vez revalorizada, estará limitado á cantidade de 2.466,20 euros, entendendo esta cantidade referida ao importe dunha mensalidade ordinaria, sen prexuízo das pagas extraordinarias que puideren corresponder. Este límite mensual será obxecto de adecuación naqueles supostos en que o pensionista teña dereito ou non a percibir 14 pagas ao ano, comprendidas, nun ou noutro caso, as pagas extraordinarias, para os efectos de que a contía non supere ou poida alcanzar, respectivamente, 34.526,80 euros, en cómputo anual.

3. As pensións que excedan os 2.466,20 euros mensuais non se revalorizarán, salvo o sinalado no número 2.

4. A revalorización das pensións de grande invalidez efectuarase aplicando as regras previstas no número 1 de maneira separada á pensión e ao incremento.

Para os efectos do límite máximo sinalado no número 2, computarase unicamente a pensión sen incremento.

Artigo 4. *Aplicación da revalorización.*

A revalorización aplicarase ao importe mensual que tiver a pensión de que se trate o 31 de decembro de 2009, excluídos os conceptos que a continuación se enumeran:

a) Os complementos recoñecidos para alcanzar os mínimos establecidos con anterioridade.

b) A recarga de prestacións económicas por falta de medidas de seguridade e hixiene no traballo.

c) As percepcións de rendas temporais por cargas familiares e a indemnización suplementaria para a provisión e renovación de aparellos de prótese e ortopedia, no suposto de pensións do extinguido seguro de accidentes de traballo e enfermidades profesionais.

Subsección 2.^a Complementos por mínimosArtigo 5. *Complementos por mínimos das pensións contributivas.*

O importe das pensións non concorrentes, unha vez revalorizadas, de acordo co disposto na subsección anterior, complementarase, de ser o caso, na contía necesaria para alcanzar as contías mínimas que se reflicten no anexo.

Artigo 6. *Límite de ingresos.*

1. Os complementos por mínimos non teñen carácter consolidable e serán absorbibles con calquera incremento futuro que poidan experimentar as percepcións do interesado, xa sexa en concepto de revalorizacións ou por recoñecemento de novas prestacións de carácter periódico que dean lugar á concurrencia de pensións, que se regula no seguinte capítulo deste real decreto. Neste último suposto, a absorción do complemento por mínimo terá efectos desde o día primeiro do mes seguinte á data da resolución de recoñecemento da nova pensión.

2. Os complementos por mínimos serán incompatibles coa percepción polo pensionista de rendementos íntegros de traballo persoal por conta propia ou allea, e/ou de capital, ou calquera outro rendimento substitutivo daqueles, cando a suma de todas as percepcións mencionadas, excluída a pensión que se vaia complementar, exceda os 6.923,90 euros ao ano, salvo nos supostos previstos no punto seguinte.

Para tal efecto tamén se computarán entre tales ingresos as plusvalías ou ganancias patrimoniais, valoradas conforme a lexislación fiscal.

Para os exclusivos efectos do recoñecemento dos complementos por mínimos das pensións contributivas da Seguridade Social, dos rendementos íntegros percibidos polo pensionista, e computados nos termos establecidos na lexislación fiscal, excluíranse os seguintes:

a) Nos rendementos íntegros procedentes do traballo, os gastos deducibles, de acordo coa lexislación fiscal.

b) Nos casos de rendementos íntegros procedentes de actividades empresariais, profesionais e agrícolas ou gandeiras, os gastos deducibles, de acordo coa lexislación fiscal.

Os rendementos íntegros do pensionista, computados na forma en que se determina nas alíneas anteriores, tomaranse no valor percibido no ano 2009, e deberanse excluír os deixados de percibir por motivo do feito causante das respectivas pensións, así como aqueloutros que se probe que non deben ser percibidos no exercicio 2010.

3. Cando a suma, en cómputo anual, dos rendementos referidos no punto anterior e os correspondentes á pensión resulte inferior á suma de 6.923,90 euros máis o importe, tamén en cómputo anual, da contía mínima fixada para a clase de pensión de que se trate, recoñecerase un complemento igual á diferenza, distribuído entre o número de mensualidades en que se perciba a pensión.

4. Presumirase que concorren os requisitos indicados nos puntos anteriores cando o interesado percibise durante 2009 rendementos, computados na forma sinalada no número 2, por contía igual ou inferior a 6.923,90 euros. Esta presunción poderase destruír, de ser o caso, polas probas obtidas pola Administración directamente ou a través dos propios interesados.

5. Os pensionistas perceptores de complementos por mínimos, que durante o ano 2009 obtivesen rendementos, polos conceptos referidos no número 2, superiores a 6.923,90 euros, deberán presentar declaración expresiva de tal circunstancia antes do día 1 de marzo de 2010.

Sen prexuízo da obriga establecida no número anterior, para acreditar as rendas e os ingresos, as entidades xestoras da Seguridade Social poderán en todo momento requirir aos perceptores de complementos por mínimos unha declaración destes, así como dos

seus bens patrimoniais e, de ser o caso, a achega das declaracións tributarias presentadas.

6. No mínimo asignado ás pensións de grande invalidez, están comprendidos os dous elementos que integran a pensión a que se refire o artigo 3.4.

7. Cando o complemento por mínimo de pensión se solicite con posterioridade ao recoñecemento daquela, producirá efectos a partir dos tres meses anteriores á data da solicitude, sempre que naquel momento se reúnan todos os requisitos para ter dereito ao mencionado complemento.

Artigo 7. Complementos por mínimos en función das diferentes modalidades de convivencia e dependencia económica.

1. Considerarase que existe cónxuxe a cargo do titular dunha pensión, para os efectos do recoñecemento das contías mínimas establecidas no anexo, cando aquel estea convivindo co pensionista e dependa economicamente del.

Salvo no caso de separación xudicial, presumirase a convivencia sempre que se conserve o vínculo matrimonial, sen prexuízo de que esa presunción se poida destruír pola actividade investigadora da Administración.

Así mesmo, entenderase que existe dependencia económica do cónxuxe cando concorran as circunstancias seguintes:

a) Que o cónxuxe do pensionista non sexa, pola súa vez, titular dunha pensión a cargo dun réxime básico público de previsión social, entendendo comprendidos nese concepto os subsidios de garantía de ingresos mínimos e de axuda por terceira persoa, ambos da Lei 13/1982, do 7 de abril, de integración social dos minusválidos, e as pensións asistenciais reguladas na Lei 45/1960, do 21 de xullo.

b) Que os rendementos por calquera natureza do pensionista e do seu cónxuxe, computados na forma sinalada no número 2 do artigo anterior, resulten inferiores a 8.076,80 euros anuais.

Cando a suma, en cómputo anual, dos rendementos referidos na letra anterior e do importe, tamén en cómputo anual, da pensión que se vaia complementar resulte inferior á suma de 8.076,80 euros e da contía anual da pensión mínima con cónxuxe a cargo de que se trate, recoñecerase un complemento igual á diferenza, distribuído entre o número de mensualidades que corresponda.

2. Considerarase que existe cónxuxe non a cargo do titular dunha pensión, para os efectos do recoñecemento das contías mínimas establecidas no anexo, cando aquel estea convivindo co pensionista e non dependa economicamente del nos termos previstos no punto anterior.

3. Considerarase que o pensionista constitúe unha unidade económica unipersoal, para os efectos da aplicación do previsto na disposición adicional vixésimo cuarta da Lei 40/2007, do 4 de decembro, de medidas en materia de seguridade social, cando, acreditando dereito a complemento por mínimos en atención aos seus ingresos, conforme o disposto no artigo anterior, non se encontre comprendido en ningún dos supostos previstos nos puntos anteriores deste artigo.

4. Os perceptores de complementos por cónxuxe a cargo estarán obrigados a declarar, dentro do mes seguinte ao momento en que se produza, calquera variación do seu estado civil que afecte esa situación, así como calquera cambio na situación de dependencia económica do seu cónxuxe.

Sen prexuízo do establecido no número precedente, as entidades xestoras da Seguridade Social poderán solicitar en calquera momento os datos identificativos do cónxuxe, así como declaración dos ingresos que perciban ambos os cónxuxes.

5. A perda do dereito ao complemento por cónxuxe a cargo terá efectos a partir do día 1 do mes seguinte a aquel en que cesen as causas que deron lugar ao seu recoñecemento.

6. A omisión por parte dos beneficiarios do cumprimento do disposto no artigo 6.5 e no número 4 deste artigo será constitutiva de infracción, a teor do disposto na sección 2.^a

do capítulo III do texto refundido da Lei sobre infraccións e sancións na orde social, aprobado polo Real decreto legislativo 5/2000, do 4 de agosto.

Sección 2.^a Pensións do extinguido seguro obrigatorio de vellez e invalidez

Artigo 8. *Revalorización das pensións do extinguido seguro obrigatorio de vellez e invalidez.*

1. A revalorización das pensións do extinguido seguro obrigatorio de vellez e invalidez non concorrentes con outras pensións públicas, calquera que sexa a data do feito causante, consistirá na diferenza entre o importe da pensión en 31 de decembro de 2009 e a contía de 5.259,80 euros, en cómputo anual.

Para os efectos do previsto no parágrafo anterior, non se considerarán pensións concorrentes as prestacións económicas recoñecidas ao abeiro da Lei 3/2005, do 18 de marzo, aos cidadáns de orixe española desprazados ao estranxeiro, durante a súa minoría de idade, como consecuencia da guerra civil, nin as pensións percibidas polos mutilados útiles ou incapacitados de primeiro grao por causa da pasada guerra civil española, calquera que for a lexislación aplicable, as pensións extraordinarias derivadas de actos de terrorismo, nin o subsidio de axuda por terceira persoa, previsto na Lei 13/1982, do 7 de abril.

Cando, para o recoñecemento dunha pensión do extinguido seguro obrigatorio de vellez e invalidez, se totalizasen períodos de seguro ou de residencia cumpridos noutros países vinculados a España por norma internacional de seguridade social que prevexa tal totalización, o importe da pensión rateada a cargo de España non poderá ser inferior a 2.629,90 euros en cómputo anual.

2. A revalorización establecida no punto anterior non ten carácter consolidable.

CAPÍTULO III

Concurrencia de pensións

Sección 1.^a Normas comúns

Artigo 9. *Concurrencia de pensións.*

1. Para os efectos do establecido neste título, entenderase que existe concurrencia de pensións cando un mesmo beneficiario teña recoñecida ou se lle recoñeza máis dunha pensión a cargo dalgunha das seguintes entidades e organismos:

a) As aboadas polo réxime de clases pasivas do Estado e, en xeral, as aboadas con cargo a créditos da sección 07 do orzamento de gastos do Estado.

b) As aboadas polo réxime xeral e os réximes especiais da Seguridade Social, as da modalidade non contributiva da Seguridade Social, as prestacións económicas por ancianidade e incapacidade a favor dos españois residentes no exterior e as pensións asistenciais por ancianidade para españois de orixe retornados.

c) As aboadas polos fondos especiais da Mutualidade Xeral de Funcionarios Civís do Estado, do Instituto Social das Forzas Armadas e da Mutualidade Xeral Xudicial ou polas propias mutualidades citadas, así como as aboadas polo Fondo Especial do Instituto Nacional da Seguridade Social.

d) As aboadas polos sistemas ou réximes de previsión das comunidades autónomas e das corporacións locais e polos propios entes.

e) As aboadas polas mutualidades, montepíos ou entidades de previsión social que se financien en todo ou en parte con recursos públicos.

f) As aboadas por empresas ou sociedades con participación maioritaria, directa ou indirecta, no seu capital, do Estado, das comunidades autónomas ou das corporacións

locais ou dos organismos autónomos dun e doutras, ben directamente ben mediante a subscripción da correspondente póliza de seguro cunha institución distinta, calquera que sexa a natureza xurídica desta ou ben polas mutualidades ou entidades de previsión daquelas, en que as achegas directas dos causantes da pensión se complementen con recursos públicos, incluídos os da propia empresa ou sociedade.

g) As aboadas pola Administración do Estado ou polas comunidades autónomas en virtude da Lei do 21 de xullo de 1960 e do Real decreto 2620/1981, do 24 de xullo, así como os subsidios económicos de garantía de ingresos mínimos e de axuda por terceira persoa, previstos na Lei 13/1982, do 7 de abril.

h) Calquera outra non enumerada nas alíneas anteriores, que se aboe total ou parcialmente con cargo a recursos públicos.

2. Non obstante, como excepción ao previsto no número 1 anterior, non terán a consideración de pensións públicas, nin, por tanto, se computarán para efectos da limitación do sinalamento inicial ou da fixación da contía máxima de percepción das pensións públicas, as aboadas a través de plans de pensións de emprego ou contratos de seguro colectivo, incluídos os formalizados por mutualidades de previsión social empresarial, promovidos polas administracións, organismos, entidades e empresas a que se refire a disposición derradeira segunda do texto refundido da Lei de regulación dos plans e fondos de pensións, aprobado polo Real decreto legislativo 1/2002, do 29 de novembro, e nos termos nela expresados.

Sección 2.^a Revalorización aplicable a pensións do sistema da Seguridade Social

Subsección 1.^a Normas xerais

Artigo 10. Revalorización das pensións concorrentes do sistema da Seguridade Social.

1. As pensións concorrentes do sistema da Seguridade Social revalorizaranse aplicando a cada unha delas o previsto no artigo 3.1, sen que a suma das pensións concorrentes, unha vez revalorizadas, poida ser superior á contía indicada no número 2 do citado artigo.

2. Se como consecuencia da aplicación do tope máximo a que se refire o artigo 3.2 se tiver que minorar a contía do incremento que se asigne en concepto de revalorización, o exceso que se deba absorber distribuirase proporcionalmente entre as contías que por revalorización correspondesen a cada unha das pensións de non existir o referido tope.

3. Cando concorran pensións revalorizables e non revalorizables do sistema da Seguridade Social, cuxa suma de importes en 2009 ascendía a 2.441,75 euros mensuais, recalcularanse, desde o seu recoñecemento inicial, as revalorizacións teóricas das pensións revalorizables para garantir, de ser o caso, o límite máximo establecido no artigo 3.2.

Artigo 11. Revalorización das pensións do sistema da Seguridade Social concorrentes con outras pensións públicas.

Cando un titular teña recoñecidas unha ou varias pensións do sistema da Seguridade Social, en concorrencia con unha ou máis pensións das mencionadas no artigo 9, a revalorización das pensións da Seguridade Social efectuarase conforme o disposto nos puntos seguintes:

1. Se a suma das pensións concorrentes non alcanza o límite máximo establecido no artigo 3.2, o importe da revalorización da pensión ou pensións da Seguridade Social determinarase con aplicación do disposto no artigo anterior.

Non obstante, non se terán en conta, para efectos da revalorización das pensións do sistema da Seguridade Social, os complementos de pensión outorgados aos traballadores, en virtude de convenio colectivo ou regulamento interior que, como consecuencia de reestruturación de cadro de persoal ou causa similar, anticipen a idade de xubilación,

obtendo a pensión con aplicación do coeficiente reductor da porcentaxe daquela. Isto sen prexuízo de que se teñan en conta para efectos da aplicación do límite máximo de 2.466,20 euros mensuais.

Cando a pensión allea ao sistema da Seguridade Social, en virtude da súa normativa específica, non experimentase revalorización, a pensión da Seguridade Social revalorizarase na porcentaxe sinalada no artigo 3.1.

2. Se a suma das pensións públicas percibidas polo titular, unha vez revalorizadas, alcanza o límite máximo sinalado no artigo 3.2, aplicaranse as regras seguintes:

Primeira.—Cando todas as pensións públicas percibidas polo titular sexan revalorizables, terase en conta o seguinte:

a) Determinarase un límite máximo anual para o importe dos pagamentos que se deban facer en relación coa pensión da Seguridade Social. Este límite consistirá nunha cifra que garde coa contía de 34.526,80 euros anuais íntegros a mesma proporción que a pensión da Seguridade Social garda en relación co conxunto de todas as pensións concorrentes que correspondan ao mesmo titular.

Este límite «L» obterase mediante a aplicación da seguinte fórmula:

$$L = \frac{P}{T} \times 34.526,80 \text{ euros anuais}$$

Sendo «P» o valor íntegro teórico anual alcanzado en 31 de decembro de 2009 da pensión a cargo da Seguridade Social, e «T» o resultado de lle engadir á cifra anterior o valor íntegro, en termos anuais, das restantes pensións concorrentes do mesmo titular.

b) Obtido este límite, a Seguridade Social só aboará en concepto de revalorización da pensión ao seu cargo as cantidades debidas en canto non excedan aquel. Noutro caso, deberá proceder á absorción do exceso sobre ese límite, en proporción á contía de cada unha das pensións concorrentes e á do exceso habido na pensión da Seguridade Social.

Segunda.—Cando as pensións alleas ao sistema da Seguridade Social, en virtude da súa normativa específica, non sexan revalorizables, a pensión da Seguridade Social revalorizarase na porcentaxe sinalada no artigo 10 ou, no seu defecto, na cantidade necesaria para que o importe conxunto de todas as pensións percibidas polo titular, unha vez revalorizadas as da Seguridade Social, non supere o límite máximo que se sinala no artigo 3.2, aplicando, de ser o caso, o previsto no artigo 10.3.

3. Para efectos de determinar o límite establecido no número 2 deste artigo, cando entre as pensións concorrentes coincidan dúas ou máis da Seguridade Social, consideraranse estas como unha soa pensión pola aplicación previa do disposto no punto anterior.

4. Cando a suma das pensións concorrentes supere a cantidade de 34.526,80 euros, en cómputo anual, as da Seguridade Social non serán obxecto de revalorización.

5. Cando, con ocasión de recoñecementos iniciais, se teña que aplicar o límite máximo a que se refire este artigo, entenderase que as pensións concorrentes se causaron asemade, cando sexa a mesma a data de efectos económicos das pensións, con independencia do momento en que se diten as resolucións ou actos de recoñecemento.

Subsección 2.^a Complementos por mínimos

Artigo 12. Aplicación dos complementos por mínimos nos supostos de concorrencia de pensións.

1. Nos supostos de concorrencia de pensións, a aplicación dos complementos por mínimos a que se refiren os artigos 5 a 7 levarase a cabo de acordo coas seguintes normas:

a) Soamente se recoñecerá complemento por mínimo se a suma de todas as pensións concorrentes, unha vez revalorizadas as da Seguridade Social de acordo coa normativa que lles sexa de aplicación, resulta inferior ao mínimo que corresponda a aquela das do sistema da Seguridade Social que o teña sinalado en maior contía, en cómputo anual. Este complemento consistirá na cantidade necesaria para alcanzar a referida contía mínima.

b) O complemento que corresponda de acordo co disposto na norma anterior afectarase á pensión concorrente determinante da citada contía mínima.

2. Para os únicos efectos de garantía de complementos por mínimos, equiparanse a ingresos ou rendementos de traballo as pensións públicas que non estean a cargo de calquera dos réximes públicos básicos de previsión social.

As cantidades a tanto global e os pagamentos periódicos aboados, con carácter compensatorio, aos pensionistas españois, ao abeiro do acordo celebrado entre España e o Reino Unido, o 18 de setembro de 2006, non se computarán para ningún efecto para o recoñecemento dos complementos para alcanzar a contía mínima das pensións.

Sección 3.^a Pensións do extinguido seguro obrigatorio de vellez e invalidez

Artigo 13. Revalorización das pensións do extinguido seguro obrigatorio de vellez e invalidez en concorrencia con outras pensións.

1. Non se revalorizarán as pensións do extinguido seguro obrigatorio de vellez e invalidez que concorran con calquera outra pensión das mencionadas no artigo 9, excepto coas prestacións económicas recoñecidas ao abeiro da Lei 3/2005, do 18 de marzo, aos cidadáns de orixe española desprazados ao estranxeiro, durante a súa minoría de idade, como consecuencia da guerra civil, coa pensión percibida polos mutilados útiles ou incapacitados de primeiro grao por causa da pasada guerra civil española, calquera que for a lexislación reguladora, co subsidio de axuda por terceira persoa previsto na Lei 13/1982, do 7 de abril, e coas pensións extraordinarias derivadas de actos de terrorismo.

2. Non obstante o disposto no punto anterior, cando a suma de todas as pensións concorrentes, unha vez revalorizadas, e as do citado seguro obrigatorio de vellez e invalidez, calculada unha e outra en cómputo anual, sexa inferior a 5.259,80 euros, a pensión do mencionado seguro revalorizarase nun importe igual á diferenza resultante. Esta diferenza non ten carácter consolidable e será absorbible con calquera incremento que poidan experimentar as percepcións do interesado, xa sexa en concepto de revalorizacións ou por recoñecemento de novas prestacións de carácter periódico.

3. Con independencia do establecido nos puntos precedentes, o importe das pensións do extinguido seguro obrigatorio de vellez e invalidez tomarase en conta para os únicos efectos da suma das pensións concorrentes a que se refire o artigo 10.1.

4. Nos supostos de concorrencia de pensións de vellez ou invalidez do extinguido seguro obrigatorio de vellez e invalidez con pensións de viuvez dalgún dos réximes do sistema da Seguridade Social ou con algunha destas pensións e, ademais, con calquera outra pensión pública de viuvez, o importe daquelas pensións será o que se determina no artigo 8.1, parágrafo primeiro, sen prexuízo da aplicación do límite establecido na disposición transitoria sétima do texto refundido da Lei xeral da seguridade social, aprobado polo Real decreto legislativo 1/1994, do 20 de xuño. No caso de se superar ese límite, o aludido importe minorarase na contía necesaria para non o superar.

Malia o anterior, nestes supostos de concorrencia, se os interesados tiveren recoñecidos importes superiores con anterioridade ao 1 de setembro de 2005, aplicaranse as normas xerais sobre revalorización contidas nos puntos anteriores, sempre que, por efecto destas normas, a suma das contías das pensións concorrentes siga sendo superior ao límite mencionado no parágrafo anterior.

CAPÍTULO IV

Pensións recoñecidas en aplicación de normas internacionais

Artigo 14. *Revalorización das pensións recoñecidas en aplicación de normas internacionais.*

1. A revalorización de pensións que fosen recoñecidas en virtude de normas internacionais das que estean a cargo da Seguridade Social un tanto por cento da súa contía teórica levarase a cabo aplicando ese tanto por cento ao incremento que correspondería de estar a cargo da Seguridade Social española o 100 por cento da citada pensión.

No importe da contía teórica a que se refire o parágrafo anterior non se considerará incluído o complemento por mínimo que, de ser o caso, poida corresponder, salvo que se dispoña outra cousa nun convenio bilateral ou multilateral.

2. Á pensión rateada, unha vez revalorizada conforme o disposto no punto anterior, engadiráselle, cando proceda en aplicación das normas xerais establecidas, o complemento por mínimos que corresponda. Este complemento calcularase aplicando a porcentaxe considerada no número 1 á diferenza que exista entre a contía que correspondería de estar a cargo da Seguridade Social española o 100 por cento da pensión e o mínimo que poida corresponder por aplicación das normas xerais.

3. Se, despois de aplicar o disposto no número anterior, a suma dos importes das pensións, recoñecidas ao abeiro dun convenio bilateral de Seguridade Social, tanto pola lexislación española como pola estranxeira, for inferior ao importe mínimo da pensión de que se trate vixente en cada momento en España, garantiráselle ao beneficiario, mentres resida en territorio nacional, a diferenza entre a suma das pensións recoñecidas, española e estranxeira, e o referido importe mínimo de acordo coas normas xerais establecidas para a súa concesión.

Para a aplicación deste número 3 e do artigo 50 do Regulamento (CEE) n.º 1408/1971 do Consello, do 14 de xuño de 1971, relativo á aplicación dos réximes de Seguridade Social aos traballadores por conta allea, aos traballadores por conta propia e ás súas familias que se desprazan dentro da comunidade, as contías fixas do extinguido seguro obrigatorio de velez e invalidez terán a consideración de importes mínimos.

4. Para efectos do establecido nos artigos 5 a 7, as prestacións percibidas con cargo a unha entidade estranxeira serán consideradas ingresos ou rendementos de traballo, salvo para a aplicación do número 3 deste mesmo artigo ou que nun convenio bilateral ou multilateral se dispoña outra cousa.

5. Para proceder ao cálculo do complemento que, de ser o caso, se lle teña que recoñecer ao beneficiario, o importe da pensión estranxeira considerarase en euros. O tipo de cambio que se aplicará será o establecido para o 1 de xaneiro de 2010 ou para a data que corresponda en función daquela en que se cause o dereito ao citado complemento durante 2010. A fixación deste cambio farase de acordo coas disposicións ditadas para a aplicación dos regulamentos comunitarios e dos convenios bilaterais.

CAPÍTULO V

Normas de aplicación*Sección 1.ª Financiamento*

Artigo 15. *Financiamento da revalorización das pensións.*

1. A revalorización das pensións establecida neste título financiarase con cargo aos recursos xerais do sistema da Seguridade Social, de acordo coas dotacións orzamentarias correspondentes.

2. As mutuas de accidentes de traballo e enfermidades profesionais da Seguridade Social participarán no custo da revalorización, incluídos os complementos por mínimos, das pensións de accidentes de traballo e enfermidades profesionais, mediante as achegas que fixe o Ministerio de Traballo e Inmigración, de acordo co establecido no artigo 76 do Regulamento xeral sobre cotización e liquidación doutros dereitos da Seguridade Social, aprobado polo Real decreto 2064/1995, do 22 de decembro, e normas concordantes.

Sección 2.^a Xestión

Artigo 16. Recoñecemento do dereito á revalorización.

O Instituto Nacional da Seguridade Social e o Instituto Social da Mariña, no ámbito das súas respectivas competencias, procederán de oficio ao recoñecemento do dereito á revalorización establecida nos artigos anteriores.

As entidades e organismos a que se refire o artigo 9 estarán obrigados a facilitar cantos datos se consideren precisos para poder efectuar a revalorización e, en especial, deberán especificar se as prestacións por eles outorgadas son ou non revalorizables, de acordo coa normativa aplicable a estas, ou se están constituídas polos complementos a que se refire o artigo 11.1, parágrafo segundo, así como o número de pagas con que se percibe a pensión.

TÍTULO II

Pensións da Seguridade Social na súa modalidade non contributiva

CAPÍTULO I

Revalorización das pensións da Seguridade Social na súa modalidade non contributiva

Artigo 17. Contía das pensións da Seguridade Social na súa modalidade non contributiva.

1. Para o ano 2010, a contía das pensións de xubilación e invalidez, na súa modalidade non contributiva, queda fixada en 4.755,80 euros íntegros anuais.

2. A contía das pensións da Seguridade Social por xubilación e invalidez, na súa modalidade non contributiva, que se recoñecesen con anterioridade ao 1 de xaneiro de 2010 ou se poidan recoñecer a partir desa data, queda fixada en 4.755,80 euros íntegros anuais.

CAPÍTULO II

Complemento a favor dos titulares dunha pensión da Seguridade Social na súa modalidade non contributiva que residan nunha vivenda alugada

Artigo 18. Obxecto.

Os beneficiarios de pensión de xubilación e invalidez da Seguridade Social, na súa modalidade non contributiva, poderán percibir o complemento anual de pensión previsto no artigo 42 da Lei 26/2009, do 23 de decembro, cando acrediten de maneira que faga fe careceren de vivenda en propiedade e residiren de forma habitual nunha vivenda alugada como titular do contrato, sempre que o propietario daquela non teña relación de parentesco co pensionista ata o terceiro grao.

Artigo 19. *Beneficiarios do complemento.*

1. Terán dereito ao complemento previsto no artigo 42 da Lei 26/2009, do 23 de decembro, as persoas que cumpran os seguintes requisitos:

- a) Ter recoñecida unha pensión de xubilación ou invalidez da Seguridade Social na súa modalidade non contributiva, na data da solicitude e na de resolución.
- b) Carecer de vivenda en propiedade.
- c) Ser titular do contrato de arrendamento da vivenda na data da solicitude.
- d) Non ter relación de parentesco ata o terceiro grao co arrendador da vivenda alugada.
- e) Ter fixada a súa residencia habitual na vivenda alugada.

2. Se na mesma vivenda alugada conviven dúas ou máis persoas que teñan recoñecida unha pensión da Seguridade Social na súa modalidade non contributiva, só terá dereito a este complemento aquel que sexa o titular do contrato de arrendamento ou, de seren varios, o primeiro deles.

Artigo 20. *Residencia habitual na vivenda alugada.*

O requisito de residencia habitual na vivenda alugada exixido para o recoñecemento do dereito ao complemento de pensión entenderase cumprido cando esa vivenda sexa o domicilio habitual do pensionista. Para tal efecto, entenderase que a vivenda é o domicilio habitual cando a vixencia do arrendamento non sexa inferior a un ano e o pensionista residise nela durante un período mínimo de 180 días inmediatamente anteriores á data da solicitude.

Artigo 21. *Competencia.*

A tramitación do procedemento para o recoñecemento deste complemento de pensión e a emisión da resolución que poña fin ao dito procedemento corresponde aos órganos competentes das respectivas comunidades autónomas, deputacións forais do País Vasco e Navarra, e direccións territoriais do Instituto de Maiores e Servizos Sociais de Ceuta e Melilla, que teñen atribuída a competencia para a xestión das pensións non contributivas da Seguridade Social.

Artigo 22. *Procedemento.*

O procedemento para o recoñecemento do dereito ao complemento previsto no artigo 42 da Lei 26/2009, do 23 de decembro, iniciarao o pensionista non contributivo ou o seu representante legal a través da presentación ata o 31 de decembro de 2010 dunha solicitude, que se deberá dirixir ao órgano competente en función do domicilio do pensionista, e poderase presentar nos rexistros e oficinas a que se refire o artigo 38.4 da Lei 30/1992, do 26 de novembro, de réxime xurídico das administracións públicas e do procedemento administrativo común.

Artigo 23. *Acreditación dos requisitos.*

1. A acreditación do cumprimento dos requisitos que o pensionista non contributivo debe reunir para ter dereito a percibir este complemento efectuarase pola declaración que realice o pensionista e xustificarse a través da seguinte documentación:

- a) O requisito de carecer de vivenda en propiedade acreditarase por certificado catastral telemático.
- b) O requisito de ser titular do contrato de arrendamento da vivenda xustificarse mediante fotocopia compulsada do contrato de arrendamento en que figure a localización da vivenda, a identificación do arrendador e do arrendatario e a duración do contrato. Ante a inexistencia do contrato de arrendamento, a condición de arrendatario acreditarase por outro medio de proba válido en dereito.

c) O requisito de residencia habitual na vivenda alugada acreditarase coa información contida no respectivo padrón municipal.

d) O requisito de non ter relación de parentesco ata o terceiro grao co arrendador da vivenda alugada acreditarase mediante declaración responsable do pensionista en que conste que o arrendador ou arrendadores da vivenda alugada non teñen con el relación de parentesco, por consanguinidade, afinidade ou adopción, ata o terceiro grao.

2. O órgano xestor competente, logo de autorización do solicitante, poderá solicitar de oficio mediante consulta nos ficheiros públicos dispoñibles os datos, documentos e certificacións necesarios para acreditar o cumprimento dos requisitos exixidos e, en especial, a certificación acreditativa de propiedades na oficina virtual do catastro e o certificado sobre o domicilio de empadramento a que se refiren o número 1 deste artigo.

Se o solicitante non autorizase expresamente o órgano competente para solicitar de oficio as certificacións referidas no parágrafo anterior, a certificación acreditativa de propiedades expedida pola Dirección Xeral do Catastro e o certificado sobre o domicilio de empadramento terán que ser presentados polo solicitante xunto coa solicitude.

Artigo 24. *Resolución e prazo.*

1. A resolución deberase ditar e notificar conforme o artigo 59 da Lei 30/1992, do 26 de novembro, no prazo máximo de tres meses desde a data en que a solicitude do complemento de pensión tivese entrada en calquera dos rexistros do órgano competente para a súa tramitación.

2. Transcorrido o prazo máximo establecido para resolver, sen se ditar e notificar resolución expresa, a solicitude entenderase desestimada por silencio administrativo, conforme o disposto na disposición adicional vixésimo quinta, número 2, do texto refundido da Lei xeral da seguridade social, sen prexuízo da resolución que se dite conforme o artigo 43.4 b) da Lei 30/1992, do 26 de novembro.

Artigo 25. *Contía do complemento.*

A contía do complemento previsto no artigo 42 da Lei 26/2009, do 23 de decembro, ascenderá a 525 euros.

Artigo 26. *Devengo e pagamento do complemento.*

O complemento de pensión devengarase anualmente na contía fixada no artigo anterior e aboarase nun único pagamento que se fará efectivo con anterioridade ao 31 de decembro de 2010.

Non obstante, a aqueles pensionistas aos cales non se lles puider aboar o complemento na data indicada no parágrafo anterior, faráselles efectivo, como máximo, dentro do prazo dos tres meses seguintes a esa data.

Artigo 27. *Exclusión do complemento no cómputo de ingresos para manter o dereito á pensión non contributiva da Seguridade Social.*

A contía do complemento de pensión recoñecido aos perceptores de pensión de xubilación e de invalidez da Seguridade Social, na súa modalidade non contributiva, estará excluída do cómputo de rendas ou ingresos para efectos de determinar o mantemento do dereito á dita pensión.

Disposición adicional primeira. *Revalorización das pensións derivadas de accidentes de traballo e enfermidades profesionais.*

Para a revalorización das pensións do sistema da Seguridade Social por incapacidade permanente ou morte e supervivencia, derivadas de accidentes de traballo ou enfermidades profesionais, terase en conta o seguinte:

a) O importe anual da pensión dividirase por 14, e o cociente resultante considerárase como importe mensual da pensión, para efectos de aplicar a revalorización xeral a que se refire o artigo 3.

b) Para a determinación dos complementos por mínimos establecidos nos artigos 5 a 7, procederase na mesma forma indicada na alínea precedente, ben que partindo da pensión xa revalorizada conforme dispón este. Cando o cociente obtido for inferior á contía mínima establecida para as pensións da súa clase, a diferenza constituirá o complemento por mínimo.

c) O aumento que resulte da aplicación do disposto na alínea a) e, de ser o caso, na b) desta disposición incrementarase ao importe de cada mensuralidade da pensión, salvo as correspondentes a xuño e novembro, en que ese incremento será dobre.

Disposición adicional segunda. *Aplicación dos complementos por mínimos en supostos especiais.*

1. Os complementos por mínimos establecidos nos artigos 5 a 7 serán tamén de aplicación ás pensións causadas a partir do 1 de xaneiro de 2010.

2. As contías fixas do extinguido seguro obrigatorio de velez e invalidez, a que se refire o artigo 8, son igualmente aplicables, de acordo co establecido nel, ás pensións causadas a partir do 1 de xaneiro de 2010.

3. Os pensionistas que, o 31 de decembro de 2009, foren menores de 60 ou 65 anos de idade pasarán a percibir, de ser o caso, as contías establecidas, para os que teñan cumprida esa idade, nos artigos mencionados nos puntos anteriores, a partir do día 1 do mes seguinte a aquel en que cumpran os 60 ou 65 anos, respectivamente.

4. Naqueles réximes do sistema da Seguridade Social que teñan previstos coeficientes redutores da idade de xubilación, en función da actividade realizada, a idade de 65 anos, para efectos de determinación do dereito aos complementos por mínimos previstos neste real decreto, entenderase cumprida cando por aplicación de tales coeficientes resulte unha idade igual ou superior á de 65 anos, sempre que os beneficiarios cumpran os demais requisitos exixidos.

Igual norma se aplicará nos supostos da xubilación especial aos 64 anos prevista no Real decreto 1194/1985, do 17 de xullo.

Disposición adicional terceira. *Revalorización das pensións extraordinarias derivadas de actos de terrorismo.*

As pensións extraordinarias da Seguridade Social orixinadas por actos de terrorismo, previstas no Real decreto 1576/1990, do 7 de decembro, serán revalorizadas nos mesmos termos e condicións que os previstos no capítulo II do título I deste real decreto e non estarán suxeitas, en ningún caso e de conformidade co previsto no artigo 46 da Lei 26/2009, do 23 de decembro, aos límites previstos con carácter xeral. Así mesmo, tampouco se computarán os importes destas pensións, para os efectos da aplicación dos mencionados límites nos supostos de concorrencia, nun mesmo titular, doutras pensións públicas.

Disposición adicional cuarta. *Rectificación dos actos de revalorización.*

Os actos das entidades ou organismos a que corresponda o recoñecemento das revalorizacións de pensión que fosen ditados en aplicación deste real decreto, poderán ser rectificadas de oficio nos casos de erros materiais ou de feito ou cando se constaten omisións ou inexactitudes nas declaracións do beneficiario, e seguirán, para tal efecto, os procedementos e os requisitos establecidos no ordenamento xurídico.

Disposición adicional quinta. *Prestacións familiares da Seguridade Social.*

Conforme o disposto na disposición adicional primeira da Lei 26/2009, do 23 de decembro, a partir do 1 de xaneiro deste exercicio económico a contía das prestacións familiares da Seguridade Social, na súa modalidade non contributiva, así como o importe

do límite de ingresos para o acceso a elas, regulados na sección segunda do capítulo IX do título II do texto refundido da Lei xeral da seguridade social, serán os seguintes:

1. A contía da asignación económica establecida no artigo 182 bis.1 será en cómputo anual de 500 euros cando o fillo ou menor acollido a cargo teña unha idade inferior a 5 anos, e de 291 euros cando o fillo ou menor acollido a cargo teña unha idade comprendida entre os 5 e 18 anos de idade.

2. As contías da asignación establecidas no artigo 182 bis.2 para os casos en que o fillo ou menor acollido a cargo teña a condición de persoa con discapacidade, serán:

a) 1.000 euros cando o fillo ou menor acollido a cargo teña un grao de discapacidade igual ou superior ao 33 por cento.

b) 4.076,40 euros cando o fillo a cargo sexa maior de 18 anos e estea afectado por unha discapacidade nun grao igual ou superior ao 65 por cento.

c) 6.115,20 euros cando o fillo a cargo sexa maior de 18 anos, estea afectado por unha discapacidade nun grao igual ou superior ao 75 por cento e, como consecuencia de perdas anatómicas ou funcionais, necesite o concurso doutra persoa para realizar os actos máis esenciais da vida, tales como vestirse, desprazarse, comer ou análogos.

3. A contía da prestación por nacemento ou adopción de fillo establecida no artigo 186.1 será de 1.000 euros.

4. A contía da prestación por nacemento ou adopción de fillo establecida no artigo 188 ter será de 2.500 euros.

5. O límite de ingresos a que se refire o primeiro parágrafo do artigo 182.1.c) queda fixado en 11.264,01 euros anuais.

O límite de ingresos a que se refire o segundo parágrafo do artigo 182.1.c) queda fixado en 16.953,05 euros anuais, incrementándose en 2.745,93 euros por cada fillo a cargo a partir do cuarto, este incluído.

Disposición adicional sexta. *Subsidio de mobilidade e compensación para gastos de transporte.*

A partir do 1 de xaneiro de 2010, o subsidio de mobilidade e compensación para gastos de transporte, regulado pola Lei 13/1982, do 7 de abril, queda fixado en 58,10 euros mes.

Disposición derradeira primeira. *Título competencial.*

Este real decreto dítase ao abeiro do disposto no artigo 149.1.17.^a da Constitución, que lle atribúe ao Estado a competencia exclusiva en materia de réxime económico da Seguridade Social.

Disposición derradeira segunda. *Habilitación para o desenvolvemento regulamentario.*

Habílitate o ministro de Traballo e Inmigración para desenvolver o disposto neste real decreto.

Disposición derradeira terceira. *Entrada en vigor.*

Este real decreto entrará en vigor o día da súa publicación no «Boletín Oficial del Estado», con efectos, respecto á revalorización das pensións, así como dos importes das asignacións económicas por fillo a cargo e do subsidio de mobilidade e compensación para gastos de transporte, desde o día 1 de xaneiro de 2010.

Dado en Madrid o 23 de decembro de 2009.

JUAN CARLOS R.

O ministro de Traballo e Inmigración,
CELESTINO CORBACHO CHAVES

ANEXO

Sistema da Seguridade Social

Cadro de contías mínimas das pensións da modalidade contributiva para o ano 2010

Clase de pensión	Titulares		
	Con cónxuxe a cargo – Euros/ano	Sen cónxuxe: Unidade económica unipersoal – Euros/ano	Con cónxuxe non a cargo – Euros/ano
<i>Xubilación</i>			
Titular con sesenta e cinco anos	10.152,80	8.229,20	7.805,00
Titular menor de sesenta e cinco anos.	9.515,80	7.697,20	7.273,00
<i>Incapacidade permanente</i>			
Grande invalidez.	15.229,20	12.343,80	11.708,20
Absoluta	10.152,80	8.229,20	7.805,00
Total: titular con sesenta e cinco anos	10.152,80	8.229,20	7.805,00
Total: titular con idade entre sesenta e sesenta e catro anos	9.515,80	7.697,20	7.273,00
Total: derivada de enfermidade común menor de sesenta anos	5.115,60	5.115,60	55% base mínima cotización Réxime Xeral
Parcial do réxime de accidentes de traballo:			
Titular con sesenta e cinco anos	10.152,80	8.229,20	7.805,00
<i>Viuvez</i>			
Titular con cargas familiares.		9.515,80	
Titular con sesenta e cinco anos ou con discapacidade en grao igual ou superior ao 65 por 100		8.229,20	
Titular con idade entre sesenta e sesenta e catro anos.		7.697,20	
Titular con menos de sesenta anos		6.228,60	

Clase de pensión	Euros/ano
<i>Orfandade</i>	
Por beneficiario.	2.511,60
Por beneficiario discapacitado menor de 18 anos cunha discapacidade en grao igual ou superior ao 65 por 100.	4.944,80
Na orfandade absoluta o mínimo incrementarase en 6.228,60 euros/ano distribuídos, de ser o caso, entre os beneficiarios.	
<i>En favor de familiares</i>	
Por beneficiario.	2.511,60
Se non existe viúvo nin orfo pensionistas:	
Un só beneficiario con sesenta e cinco anos.	6.074,60
Un só beneficiario menor de sesenta e cinco anos.	5.720,40
Varios beneficiarios: o mínimo asignado a cada un deles incrementarase no importe que resulte de ratear 3.717,00 euros/ano entre o número de beneficiarios.	